



SUTTON PARK SCHOOL
89 Vine Street, Mangere East, Auckland 2024
Telephone (09) 276 4560 Facsimile: (09) 276 4529

Principal: Fa'atili Iosua Esera

Aso Lua 21 Aperila 2020

O le faamalō ma le faafetai tele atu Mātua!

Ou te avatu lava le faafetai tele ma le faamalō, i lo outou fesoasoani, ma le tu'u tu'u tau'au mai ina ia faasaoina i tatou mai le faama'i mata'utia. E fiafia ai le agaga, i le fa'aitiitia pea o le fuainumera o i latou ua a'afia i le siama (tulou) E ao ona tatou faafetai a'e i le Atua, ua ia faasopoloa faanoanoaga mai ia i tatou. Ae tatou manatua i latou ua ma'umau soifua ona o lenei faama'i, ua motusia ai mafutaga ma ē pelē ma mamaē. O la'u faamanatu mo i tatou uma. Ia tatou mataala, ma mata'itūina pea āuga o lenei faama'i, ma saogalemu mai ai, a o tatou agai atu i le Vaega lona 3 o Lapata'iga mo le Soifua Maloloina. (Lockdown Level 3)

Ua i ai suiga tāua ua ioeina e le Komiti Fa'afaoe o le tatou a'oga, pe afai o le a toe tatalaina le a'oga. O le a faaauauina pea le **Vavao** mo Sutton Park, **se'i vaganā ai faiaoga ma fanau a'oga, e mafai ona ulufale.** O le a lē toe faatagaina lava se tasi, ona toe la'asia pe ulufale i le lotoā o le a'oga. O le a lokaina foi le pā a le a'oga mai le 9a.m, e oo i le 2.30pm. O ia suiga, e tataua ona utagia ma tausiona e mātua, ma tagata uma, a o le i toe amataina le a'oga.

O le soifua lelei ma le maloloina o fanau, faiaoga ma le faalapotopoga (community) e tataua lava ona matuā faatāuaina. O lou lagolagoina ma le tausiona o nei suiga, o le a toe iloiloaina i le faaiuga o le kuata lenei. Pe afai o le a i ai se tasi o le fanau, poo se faiaoga, o le a pēsia i le siama o le faama'i, o le a tapunia loa le a'oga, mo se taimi umi.

O le filifiliga a Mātua, e tuuina mai ai lona alo/fanau, i le a'oga a o tatou i ai i le Vaega lona 3 o Lapata'iga mo le Saogalemu. Afai e te silafia, o lo o lelei le vaaiga o fanau ma saogalemu i totonu o aiga, ona tuu lea o lou alo i le fale.. Mo aiga e toatele nai fanau. E mafai ona o mai nisi tamaiti i le a'oga, ae nonofo isi i le fale, o le filifiliga lenā a oe le matua. O le a fa'aaauu pea ona tuuina atu e faiaoga, galuega a le fanau i luga o le upega o fesoota'iga, po o ni galuega tuu sa'o atu mai potu a'oga. Ae mo le taimi lenei, o le nofoaga silisili ona saogalemu mo fanau, o totonu lava o le aiga. O nei suiga ua faia, ina ia mautinoa lo tatou saogalemu faatasi mai le faama'i. Peita'i, e lē mafai e le Komiti Faafaoe, poo a'u nei, ona matou faapea atu, o le a saogalemu lou alo mai le Korona vairusi 19, i totonu o Sutton Park.

O faiaoga o le a i ai a'afiaga o le faama'i, po ua pēsia foi mai i nisi ua a'afia I le Covid 19 , o le a faamalolō i le fale. O le a logoina ma faafesoota'ia mātua ma fanau o vasega e i ai se faiaoga o le a a'afia i le faama'i.

O le *Vavao* lenei, ua avea ma **avanoa faa-auro**, e mafuta ma feso'otai atili ai mātua ma fanau. E talatalanoa ai, a'oa'o le fanau i tū ma aga i totonu o aiga, a'oa'o nai pese, ma faata'ita'i le tāina o la'au tau musika (piano/kitara) faamatala i ai ni tala o taimi ua tuana'i/tala o le vavau, fa'aa'oa'o i ai le kukaina o se taumafa faaSamoa. O avanoa e faia ai faitau tusi, faitau le Tusi Pa'ia, fai se tatalo, fai se tautalaga faafetai, fatufatu se tauloto po o se pese, tusi se tusi e momoli ai alofaaga ma faamanuiaga i le isi tagata, O se avanoa tāua tele, e faata'ita'i atu ai le fanau iā oe le matua, ia 'aua nei e faavaivai, a ia taumafai i le *mafai silisili e mafai ai*. **O le a avea lenā o se pine faamau i olaga o le fanau, o le a lē mafai ona toe mamulu.** Ia maua pea lou to'a, ma le lava-faapale mo nai fanau. Aua foi ne'i avea galuega a le fanau ua tuuina atu, ma ala e te atuatuva'e ma e popole ai. A ia tou maua faatasi le fiafia ma nai fanau, a o tou mafuta ma nonofo ai i malu o maota ma laoa.

O ta'ita'i o syndicate ma iunite taitasi, o le a latou faasoasoina atu alaga-oa tau tekonolosi (chromebooks/devices) O le a faamuamua vaega ia, i fanau o lo o i le Tausaga 5 e oo i le 8. E ui lava ina o le a toe a'e mai le aoga i le Ao Lulu, 29 Aperila, ae tāua le fesoasoani a nei devices mo nai fanau, a o nonofo ai i le fale. **Afai e oo atu lea fesoasoani i lou aiga, faamolemole, ia vaaia lelei, ma faaoga ma le faaeteete. E lē manaomia le toe faafoi mai o chromebooks/devices, ua leaga.**

Fa'afeso'ota'i mai a'u i le imeli : principal@suttonpark.school.nz pe text mai foi i le **021-250-6684** Ou te feso'ota'i atu, pe a manaomia se fesoasoani, pe i ai foi ni vaega tou te fia silafia atili. Ua tatou i ai nei i taimi o le fememēa'i ma le lē mautonu. O le a umi foi se taimi, e toe foi ma faamasani ai i tulaga e pei ona tatou masani ai. Ia alofa le Atua, ma fa'aaauau pea Lona agalelei. Ia ogatotonu pea o Ia, I nai o tatou aiga uma, ma le mafanafana o Lana faamalologa, a o tatou valavala ai i lenei vaitau, seia oo ina toe ofaga potopoto si o tatou aiga, ma feiloa'i i le manuia, i se taimi e le o toe mamao lava, pe a tusa ai ma Lona finagalo. Soifua.

Faafetai lava,

O Alofaaga ma faamanuiaga mo outou uma, aemaise nai fanau,

Fa'atili Iosua Esera
Tumuaki/Pulea'oga/Puleako/Principal
Master of Education [Merit]